

COMUNICATO n. 773 del 25/03/2026

Gerosa: “An ändadar tritt vürsnen zo sterchra di edukatìf dienst vor di khlumman khindarn”

Huam èstgert-Tagesmutter: ågenump in naüge profil inngevüart in provintziàl Repertorio von titln

[Cimbro] Da autonome Provìntz vo Tria macht an ändarn tritt vürsnen zo sterchra di edukatìf dienst vor di khlumman khindarn un zo darkhenna di arbat kompetentzan. Pinn naüge provedimént ågenump an vraita atz 20 von lentz vodar provintziàl DJunta, izta khent auzgemacht dar arbat profil “edukatìf arbatar in huam èstgert - dienst Tagesmutter” un inngevüart in provintziàl Repertorio von professionèll titln. “Pitt ditza dar provintziàl Repertorio machtze raichar innvüarante a naüga stratègesche profesionèll figùr – asó hatta khött di asesören vor di istrutzióng Francesca Gerosa – ditza helft zo haba an edukatìf opfar hërta pezzrar un guat zo rispundra azpe ’z hatt z’soina in mångl von lentar. Dar provedimént iz an ändadar tritt vürsnen aftn bege zo sterchra in provintziàl sistèm boda zertifikàrt di kompetentzan, un ditza helft saiz in profesionìstn saiz in trentinar famildje.

Ditza maz steat drinn in sèll boda auzmacht di delibera n. 970 von 4 von höbiat 2025 boda hatt inngevüart daz sèll boda iz mångl zo haba vürzovüara an huam èstgart-Tagesmutter in Trentino, un bia zo zertifikara di kompetentzan nå in sèll boda khütt daz provintziàl Gesetz von earst von höbiat 2013 n. 10 übar abelirnen durch auz. Disa modalitét steat darzuar dar formatzióng bodada sa iz sidar långa zait von 500 urn un gitt an naüing modo zo maga hãm in titl zo arbata in huam èstgertar.

Dar profesionèll profil iz khent nidargeschribet von Dienst vor di edukatìf aktivitétt boda ågian in khindar, dòpo zo haba vorstånt baz ’z mochte khemmen getánt zo schütza gebort politike, un bia zo helva in famildje un stercharn di edukatìf dienst vor di khindar sin afte drai djar. Da tèknesche arbat iz khent vürgevüart von Åmt vor politike innzonema alle un von Dienst vor di istrutzióng, haltante kunt daz earst vo allz von natziònàl Repertorio un von natziònàl Quadro von titln.

Hãm drinngelèkk in provintziàl Repertorio in naüge profil iz a bichtegar strumént zo geba vèrt in kompetentzan boda a mensch boda bill arbatn in di dienst vo huam èstgart-Tagesmutter hatt sa augenump, durch mearare esperientzan. In da gelaichege zait helft zo sichra an hoachan profesionèll standard vor di dienst boda ågian in khlumman khindarn asó zpe da auzmacht daz provintziàl Gesetz.

’Z zil von provedimént iz duppl: aftna sait krescharn di opfar vo dienst vor di khlumman khindar zo maga gem hërta mearare hilfan in famildje; aftz d’åndar schützan di politike zo geba vèrt dar arbat sterchrante in provintziàl sistèm boda zertifikart di kmpotentzan.

Übarsetzt von Schaltarle vor di zung von Toalkamou vodar Zimbar Hoachebene

(cdt)